



Republika e Kosovës

Republika Kosova-Republic of Kosovo

Qeveria-Vlada-Government

Ministria e Drejtësisë –Ministarstvo Pravde –Ministry of Justice

PROJEKTLIGJI PËR AVOKATURËN SHETËRORE

REPUBLIKA E KOSOVËS

KUVENDI

Në mbështetje të nenit 65 (1) të Kushtetutës së Republikës së Kosovës,

M i r a t o n :

LIGJIN PËR AVOKATURËN SHETËRORE

KREU I

DISPOZITAT E PËRGJITHSHME

Neni 1 **Fushëveprimi**

Me këtë ligj rregullohet themelimi, organizimi dhe kompetencat e Avokaturës Shtetërore të Republikës së Kosovës, kushtet dhe procedura për emërimin dhe shkarkimin e Avokatit të Përgjithshëm Shtetëror dhe të avokatëve shtetëror, mjetet për punë, autorizimet e tyre, të drejtat dhe detyrimet si dhe çështjet tjera me rëndësi për punën e saj.

Neni 2 **Themelimi**

Me këtë ligj themelohet Avokatura Shtetërore e Republikës së Kosovës (më tej: Avokatura Shtetërore) si mekanizëm i pavarur dhe i qëndrueshëm i përfaqësimit të pavarur ligjor të autoriteteve publike të Republikës së Kosovës në procedurat gjyqësore dhe administrative.

Neni 3 **Parimet e punës**

1. Avokatura Shtetërore kryen funksionin e saj në pajtim me Kushtetutën, ligjet, dispozitat tjera dhe aktet e përgjithshme duke respektuar parimin e ligjshmërisë, paanshmërisë, profesionalizmit, efikasitetit, llogaridhënies dhe korrektësisë.
2. Askush nuk ka të drejtë që të ndikojë në çfarëdo mënyre në Avokaturën Shtetërore në kryerjen e funksionit të saj.

Neni 4

Puna publike

1. Puna e Avokaturës Shtetërore është publike dhe secili person mund të ketë qasje në informacione në pajtim me ligjin.
2. Nëse Avokati i Përgjithshëm Shtetëror konsideron se kjo është e dobishme, mundet, nëpërmjet mjeteve të informimit, ta informojë publikun për shkallën e përfaqësimit dhe mbrojtjes së interesave të autoriteteve publike.

Neni 5 Gjuhët

Në punën e Avokaturës Shtetërore në përdorim janë gjuhët zyrtare të parapara me Kushtetutë dhe ligj.

Neni 6

Vula

1. Avokatura Shtetërore ka vulën e saj sipas formës dhe diametrit të përcaktuar me dispozitat për vulat.
2. Vula e Avokaturës Shtetërore ka formën rrethore ashtu siç përcaktohet me Ligjin për vulat në Institucionet e Qeverisë së Republikës së Kosovës.
3. Madhësia e vulës së Avokaturës Shtetërore është me diametër 40 mm.
4. Teksti i vulës së Avokaturës Shtetërore shkruhet me shkronja të mëdha të shtypit në madhësi dhe formë të njëjtë në gjuhët zyrtare të Kosovës
5. Vula e Avokaturës Shtetërore përmban këto të dhëna:
 - 5.1 në rrethin e parë të jashtëm shkruhet: Republika e Kosovës;
 - 5.2 në rrethin e dytë shkruhet: Qeveria e Republikës së Kosovës
 - 5.3. në rrethin e tret shkruhet: Ministria e Dritësisë;
 - 5.4. në rrethin e katërt shkruhet: Avokatura shtetërore dhe
 - 5.5 në sipërfaqen e mbetur brenda rrethit më të vogël të vulës shënohet: stema e Republikës së Kosovës.

Neni 7

Mjetet e punës

Mjetet për punën e Avokaturës Shtetërore sigurohen në buxhetin e Republikës së Kosovës.

KREU II

STATUSI JURIDIK, KOMPETENCA DHE ORGANIZIMI I AVOKATURËS SHTETËRORE

Neni 8

Statusi juridik

1. Avokatura Shtetërore është organ qendror i administratës në varësi të Ministrisë së Drejtësisë.
2. Avokatura Shtetërore ka statusin e personit juridik me seli në Prishtinë.

Neni 9

Kompetenca

1. Avokatura Shtetërore përfaqëson autoritetet publike të Republikës së Kosovës në procedurat gjyqësore, të arbitrazhit dhe administratës në pajtim me këtë ligj dhe dispozitat ligjore për menaxhimin e financave publike dhe përgjegjësitë.
2. Avokatura Shtetërore kryen edhe punë të tjera të përcaktuara me ligj.

Neni 10

Ushtrimi i funksionit

1. Funksionin e avokaturës shtetërore e ushtrojnë Avokati i Përgjithshëm Shtetëror dhe avokatët shtetëror në Avokaturën Shtetërore.
2. Avokati i Përgjithshëm Shtetëror dhe avokatët shtetëror në kryerjen e funksionit të tyre janë të pavarur. Avokati i Përgjithshëm për punën e vet i përgjigjet Ministrit të Drejtësisë.
3. Avokati i Përgjithshëm shtetëror e paraqet dhe përfaqëson Avokaturën Shtetërore, udhëheqë dhe ndërmerr veprime për të cilën është i autorizuar me këtë apo ligj tjetër.

Neni 11

Avokatët shtetëror

1. Avokatët shtetëror për punë e tyre i përgjigjen Avokatit të Përgjithshëm Shtetëror.
2. Avokatët shtetëror e informojnë Avokatin e Përgjithshëm Shtetëror për gjendjen e

përfaqësimit të lëndëve.

3. Avokati i Përgjithshëm Shtetëror ua ndan detyrat avokatëve shtetëror dhe u jep instruksione të përgjithshme detyruese lidhur me kryerjen e detyrave, në pajtim me Rregulloren për organizimin e brendshëm dhe sistematizimin e vendeve të punës të Avokaturës Shtetërore. Në kuptim të këtij ligji, instruksione për punë avokatëve shtetëror përfshinë drejtimet e përgjithshme lidhur me kryerjen e detyrave dhe të aktiviteteve, si dhe orientimet për ndërmarrjen e procedurave dhe të masave në rastet konkrete.

4. Në kryerjen e punëve të përfaqësimit Avokatura Shtetërore është e autorizuar që të ndërmerr të gjitha veprimet të cilat i ndërmerr pala në procedurë, në pajtim me ligjet në fuqi të Republikës së Kosovës.

5. Avokati i Përgjithshëm Shtetëror mund të autorizojë edhe personin e punësuar në Avokaturën Shtetërore me provim të dhënë të jurisprudencës i cili punon në punët juridike që të përfaqësoj në gjykata dhe organe tjera në kontestet pasurore-juridike.

6. Avokati i Përgjithshëm Shtetëror mundet të autorizojë edhe personin e punësuar në organin e administratës shtetërore me provimin e dhënë të jurisprudencës, i cili punon në punët juridike, që ta përfaqësojë në gjykata dhe organe tjera në kontestet pasurore-juridike.

Neni 12

Përfshirja

Rregullat e procedurës kontestimore për përfshirjen e gjyqtarëve përshtatshëmish zbatohen edhe për përfshirjen e Avokatit të Përgjithshëm Shtetëror dhe për avokatët shtetëror.

Neni 13

Shpenzimet e përfaqësimit

1. Shpenzimet për përfaqësim nga ana e Avokatit të Përgjithshëm Shtetëror dhe avokatëve shtetëror përcaktohen sipas Tarifës për shpërblime dhe kompensim të shpenzimeve për punën e avokatëve.

2. Mjetet e paguar në emër të shpenzimeve për përfaqësim janë të hyra të Buxhetit të Republikës së Kosovës.

Neni 14

Struktura e Avokaturës Shtetërore

1. Funkcionin e Avokaturës Shtetërore e kryen Avokati i Përgjithshëm Shtetëror.

2. Avokatura Shtetërore ka numër të caktuar të avokatëve shtetëror.

3. Numrin e avokatëve shtetëror, me propozimin e Avokatit të Përgjithshëm Shtetëror e përcakton Ministri i Drejtësisë. Me rastin e nxjerrjes së vendimit me të cilin përcaktohet numri i avokatëve shtetëror merret parasysh numri, lloji dhe karakteri i lëndëve.

4. Për kryerjen e punëve dhe detyrave nga kompetenca e Avokaturës Shtetërore si njësi themelore organizative themelohet Zyra Qëndrore e Avokaturës Shtetërore me seli në Prishtinë.

5. Zyra Qendrore e Avokaturës Shtetërore e përcjell dhe mbikqyrë ligjshmërinë e punës dhe të veprimit të njësive organizative të Avokaturës Shtetërore.

6. Në Zyrën Qendrore të Avokaturës Shtetërore themelohen drejtoritë dhe sektoret. Me drejtorinë dhe sektorin udhëheqin udhëheqësit, të cilët emrohen nga Avokati i Përgjithshëm Shtetëror.

7. Avokati i Përgjithshëm Shtetëror njëherit është edhe udhëheqës i Zyrës Qendrore të Avokaturës Shtetërore.

Neni 15

Papajtueshmëria

Avokati Shtetëror nuk mund të ushtrojë funksione të tjera publike ose private të cilat janë në kundërshtim me funksionet e tij të përcaktuara me këtë Ligj.

Neni 16

Konflikti Individual i Interesit

Gjatë ushtrimit të funksioneve të tij publike, Avokati i Përgjithshëm Shtetëror, si dhe cilido avokat tjetër shtetëror, nuk mund të përfaqësojë autoritetet publike nëse ka interes personal direkt ose indirekt, në rastin që gjykohet, qoftë ky interes i njohur publikisht apo jo.

KREU III

EMRIMI DHE PUSHIMI I FUNKSIONIT

Neni 16

Emërimi i Avokatit të Përgjithshëm Shtetëror dhe i avokatëve shtetëror

1. Avokatin e Përgjithshëm Shtetëror me propozimin e Ministrit të Drejtësisë e emëron Qeveria e Republikës së Kosovës.

2. Avokatët shtetëror me propozimin e Avokatit të Përgjithshëm Shtetëror i emëron Ministri i Drejtësisë.

3. Avokati i Përgjithshëm Shtetëror dhe avokatët shtetëror emërohen me konkurs publik sipas procedurës së paraparë me dispozitat për emërimin për pozitat e larta drejtuese në Shërbimin Civil të Republikës së Kosovës.

4. Avokati i Përgjithshëm Shtetëror emërohet në bazë të konkursit të hapur në pajtim me dispozitat për Shërbimin Civil për emërimin për pozitat e larta drejtuese në Shërbimin Civil të Republikës së Kosovës. Komisioni profesional vlerësues duhet të përbëhet nga profesionist përfaqësues të Ministrisë së Drejtësisë, gjyqëtar i Gjykatës së Apelit apo i gjykatës themelore, prokuror i shtetit, një përfaqësues të shoqërisë civile dhe profesor i fakultetit të drejtësisë i drejtimit civilo juridik.

5. Avokatët shtetëror në Avokaturën Shtetërore emërohen me konkurs të hapur nga Ministria e Drejtësisë në pajtim me dispozitat për Shërbimin Civil për emërimin për pozitat e larta drejtuese në Shërbimin Civil të Republikës së Kosovës. Për emërimin e avokatëve shtetëror përshtatshëmrisht zbatohen dispozitat për emërimin e Avokatit të Përgjithshëm Shtetëror.

Neni 18

Kohëzgjatja e funksionit

1. Avokati i Përgjithshëm Shtetëror emërohet për periudhën katër vjeçare dhe mundet të emërohet përsëri.

2. Avokatët shtetëror emërohen pa kufizim të kohëzgjatjes së funksionit.

Neni 19

Kushtet për emërim

1. Për Avokat të Përgjithshëm Shtetëror dhe për avokat shtetëror mund të emërohet çdo person i cili i plotëson këto kushte të përgjithshme:

1.1 të jetë shtetasi Republikës së Kosovës;

1.2 të jetë jurist i diplomuar;

1.3 të ketë dhënë provimin e jurisprudencës;

1.4 të jetë person me kualitete të larta morale dhe të ketë përvojën e nevojshme dhe aftësi profesionale në fushën e drejtësisë.

1.5 të mos ketë qenë i dënuar me vendim të formës së prerë për vepër penale, ashtu siç përcaktohet me ligjin në fuqi;

1.6 të mos jetë shkarkuar nga shërbimi civil apo nga ndonjë funksion tjetër publik i Republikës së Kosovës për shkak të shkeljes së detyrës apo paaftësisë për të kryer detyrën.

2. Personi mund të emërohet për Avokat të Përgjithshëm Shtetëror i cili përveç kushteve të parapara me këtë ligj plotëson edhe kushtin e veçanta, të ketë së paku 10 (dhjet) vjet përvojë pune në punët juridike pas dhënies së provimit të jurisprudencës, në ndonjë institucion të judikaturës, avokaturë apo në institucione tjera.

3. Personi mund të emërohet për avokat shtetëror nëse përveç kushteve të parapara me këtë ligj plotëson edhe kushtin e veçantë, të ketë së paku 5 (pesë) vjet përvojë pune në punët juridike pas dhënies së provimit të jurisprudencës, në ndonjë institucion të judikaturës, avokaturë apo në institucione tjera.

Neni 20

Marrja e detyrës

1. Avokati i Përgjithshëm Shtetëror, përkatësisht avokati shtetëror i emëruar ia fillon detyrën menjëherë pas emërimit, e më së voni në afat prej 15 ditësh nga dita kur është emëruar.

2. Nëse nga shkaqet të cilat nuk janë të arsyeshme kandidati i emëruar nuk e merr detyrën në afatin e përcaktuar në paragrafin 1 të këtij neni, Ministri i drejtësisë e anulon vendimin për emërim. Në atë detyrë do të emërohet personi tjetër nga lista e përzgjedhur apo përsëri do të publikohet konkursi për atë vend të lirë.

Neni 21

Pushimi i funksionit të Avokatit të Përgjithshëm Shtetëror

1. Avokatit të Përgjithshëm Shtetëror i pushon funksioni:

1.1 me kërkesën e tij;

1.2 kur i mbush 65 vjet për shkuarje të detyrueshme në pension;

1.3 kur skadon afati për të cilin është emëruar;

1.4 në rastin e shkarkimit të tij si rezultat i procedurës disiplinore;

1.5 nëse në bazë të dokumentacionit medicinal të institucionit shëndetësor vërtetohet se përgjithmonë e ka humbur aftësinë punuese për ushtrimin e detyrës;

1.6 nëse është dënuar për vepër penale me dashje me dënim me burg pa kusht në kohëzgjatje së paku gjashtë muaj, apo nëse është dënuar për vepër penale e cila e bënë të padenjë për ushtrimin e detyrës.

Neni 22

Pushimi i funksionit të avokatit shtetëror

1. Funkzioni i avokatit shtetëror pushon:

1.1 me kërkesën e tij;

1.2 kur mbush moshën 65 vjeçare për shkuarje të detyrueshme në pension;

1.3 në rastin e shkarkimit të tij/saj si rezultat i procedurës disiplinore;

1.4 nëse në bazë të dokumentacionit medicinal të institucionit shëndetësor vërtetohet se përherë e ka humbur aftësinë për ushtrimin e detyrës;

1.5 nëse është dënuar për vepër penale me dashje me dënim me burg pakusht në kohëzgjatje prej më së paku gjashtë muaj, apo nëse është dënuar për vepër penale e cila e bënë të padenjë për ushtrimin e detyrës.

Neni 23

Suspendimi

1. Avokati i Përgjithshëm Shtetëror apo avokati shtetëror i cili gjendet në paraburgim përkohësisht suspendohet (suspendimi i detyrueshëm). Suspendimi zgjatë derisa personi gjendet në paraburgim.

2. Avokati i Përgjithshëm Shtetëror apo avokati shtetëror i cili gjendet në paraburgim përkohësisht suspendohet (suspendimi diskrecional) nëse:

2.1 kundër tij ka filluar hetimi në procedurën penale;

2.2 kundër tij prokurori i shtetit ka ngritur aktakuzë për vepër penale;

2.3 kundër tij ka filluar procedura e shkarkimit;

2.4 kundër tij ka filluar procedura disiplinore, ndërsa organi disiplinor vërteton se përgjegjësia disiplinore nuk mund të përcaktohet në mënyrë të drejtë, nëse Avokati i Përgjithshëm Shtetëror apo avokati shtetëror përkohësisht nuk suspendohen gjatë procedurës;

2.5 kryerja e detyrave zyrtare në mënyrë të konsiderueshme është rënduar për shkak gjendjes së tij mentale, emocionale dhe fizike.

Neni 24

Përgjegjësia e Avokatit të Përgjithshëm Shtetëror dhe avokatëve shtetëror

Dispozitat për shërbyesit civil të Republikës së Kosovës lidhur me menaxhimin dhe përgjegjësinë e funksioneve për emërimet të larta në mënyrë të përshtatshme vlejné edhe për Avokatin e Përgjithshëm Shtetërorë dhe për avokatët shtetëror.

KREU IV

TË PUNËSUARIT NË AVOKATURËN SHETËRORE

Neni 25

Personeli civil në Avokaturën Shtetërore

1. Avokatura Shtetërore ka numër të caktuar të nëpunësve civil për kryerjen e punëve profesionale dhe administrativo-teknike.
2. Avokatura Shtetërore mund të punësojë numër të caktuar të zyrtarëve profesional të cilët iu ndihmojnë bartësve të funksioneve në kryerjen e punëve juridike.
3. Numri i shërbyesve civil në Avokaturën Shtetërore përcaktohet me aktin për organizimin e brendshëm dhe sistematizimin e vendeve të punës të Avokaturës Shtetërore. Aktin për organizimin e brendshëm dhe sistematizimin e vendeve të punës së Avokaturës Shtetërore, të cilin e përgatitë Avokati i Përgjithshëm Shtetëror, e miraton Ministri i drejtësisë.
4. Dispozitat për shërbyesit civil në organet e administratës shtetërore, përshtatshëmish zbatohen edhe për nëpunësit civil në Avokaturën Shtetërore, nëse me këtë ligj nuk është caktuar ndryshe.

Neni 26

Aftësimi profesional

1. Avokati i Përgjithshëm Shtetëror, avokatët shtetëror dhe nëpunësit civil në Avokaturën Shtetërore kanë të drejtë dhe detyrim në aftësim dhe arsimim profesional të përhershëm.
2. Për nevoja të aftëimit dhe arsimimit profesional sigurohen mjete të veçanta në Buxhetin e Republikës së Kosovës të destinuar për Avokaturën Shtetërore, si dhe nga burime tjera të mjeteve.

Neni 27

Vlerësimi i shkathtësive profesionale

1. Në fund të çdo viti kalendarik, avokatët Shtetëror i nënshtrohen procedurës së vlerësimit të shkathtësive profesionale, e cila kryhet nga Avokati i Përgjithshëm Shtetëror, i cili/e cila merr parasysh rezultatet e arritura gjatë procedurave gjyqësore dhe përfaqësimeve të kryera gjatë periudhës së vlerësimit.

2. Kriteret për vlerësim, rregullat dhe procedurat përcaktohen me Rregullore të brendshme të Punës së Avokaturës Shtetërore, të cilin e nxjerr Ministri i Drejtësisë.

3. Vlerësimi me të cilin konstatohet paaftësi profesionale përbën shkak për inicim të shkarkimit të një avokati shtetëror.

KREU V

PAGAT

Neni 28

Pagat e Avokatëve Shtetëror

1. Niveli i pagës së Avokatit të Përgjithshëm Shtetëror dhe i avokatëve shtetëror caktohet në pajtim me Ligjin për Pagat e nëpunësve civil dhe të akteve nënligjore përkatëse për zbatimin e dispozitave për pagat e nëpunësve civil të nivelit të lartë drejtues.

2. Niveli i pagës së personelit tjetër të Avokaturës Shtetërore përcaktohet në pajtim me Ligjin për Pagat e nëpunësve civil.

KREU VI

DISPOZITAT KALIMTARE DHE PËRFUNDIMTARE

Neni 29

Marrja e lëndëve

1. Avokati i Përgjithshëm Shtetëror do të marr lëndët nga kompetenca e vet nga Divizioni për Përfaqësim në Ministrinë e Drejtësisë në afat prej 30 ditësh nga dita e plotësimit të vendeve të punës e cila siguron funksionimin e Avokaturës Shtetërore.

2. Avokati i Përgjithshëm Shtetëror duhet me shkrim ta informoj Ministrin e Drejtësisë për marrjen e lëndëve nga paragrafi 1 i këtij neni në afat prej 15 ditësh nga data e kryerjes së pranim dorëzimit.

3. Avokati i Përgjithshëm Shtetëror dhe Udhëheqësi i Divizionit për Përfaqësim pranë Ministrisë së Drejtësisë nga paragrafi 1 i këtij neni përpilojnë regjistrin e lëndëve të marra dhe evidencën dhe arkivin e lëndëve.

4. Ditën e marrjes së lëndëve Divizioni për Përfaqësim pranë Ministrisë së Drejtësisë do të pushojë t'i kryej detyrat e përfaqësimit të autoriteteve publike.

Neni 30

Vazhdimi i punës së personelit civil

Me fillimin e zbatimit të këtij ligji, të punësuarit në Divizionin për Përfaqësim në Ministrinë e Drejtësisë vazhdojnë të punojnë në Avokaturën Shtetërore në pajtim me dispozita e këtij ligji.

Neni 31

Emërimi i Avokatit të përgjithshëm Shtetëror dhe i avokatëve shtetëror

Brenda 3 muajve pas hyrjes në fuqi të këtij ligji emërohet Avokati i Përgjithshëm Shtetëror, ndërsa brenda 3 muajve pas emërimit të Avokatit të Përgjithshëm Shtetëror emërohen avokatët shtetëror.

Neni 32

Aktet nënligjore

Brenda 6 muajve pas hyrjes në fuqi të këtij ligji, do të nxirren aktet nënligjore të parapara me këtë ligj.

Neni 33

Shfuqizimi i legjislacionit të aplikueshëm

Me ditën e fillimit të zbatimit të këtij ligji shfuqizohet legjislacioni i aplikueshëm për avokaturën publike.

Neni 34

Hyrja në fuqi

Ky ligj hynë në fuqi 15 ditë pas publikimit në Gazetën Zyrtare të Republikës së Kosovës, ndërsa do të zbatohet prej janarit 2013.

Kryetari i Kuvendit të Republikës së Kosovës,

Jakup KRASNIQI